

3 John

Roube'aten Ana Tur

John ana fef baitounin Kirisiyan hai bonawiyenayah isah kirum saise taituwah tur gewasin hibai hitit tafaram ta ta wanawanan tur gewasin hifafaram i hitibaisih isan. Naatu iti fef i bonawiyenayan orot wabin Gaius isan kirum. Anayabin Gaius i Kirisiyan moumurih na'in tur hifaram hiremor bibaisih naatu koufair bitih.

Fef wanawanan tur iti na'atube hi'asgidigid

Merarayow (1-4)

Gaius ana merarayow (5-8)

Diotehes hikusair (9-10)

Demeirus Hikusair (11-12)

Tur Yomanin (13-15)

^{1a}Iti fef i ayu John, ekaleisia hai nabatanenayan Gaius isa akikirum. Taiu isa i turobe abiyabow. ²Are au ofonah, isa ayoyoyoban saise sawar etei kwasisinaf boro hinanunuw gewas, ayub kwakaif gewas kwama'am hina hitenya'u asoso'ob na'atube, biya auman kwanakaif gewas kwanama. ^{3b}Kwa turobe kwabukikin kwama'ama isan naatu mar etei turobe ana yawasamaim kwabowabow auman. Taituwat nati'ine hina hitit au tur hio'owen ana vey a yasisir gagamin maiyow. ⁴Natunatu turobe ana yawasamaim kwama'am isan hio anowar abiyasisir. I men sawar afa isah abiyasisir na'atube'emih, iti tur anonowar i ai yasisir gagamin maiyow.

Gaius Hibora'ara'ah

⁵Taiu, o i bowabow gewasin maiyow taituwa isah kubowabow, basit taituwa afa i menah tatabirih, baise o kubibaisih. ^{6c}O a yabow nati'imaim sabuw isah mi'tube kubiyabow isan iti ekalesia wanawanahimaim

^a 1 Act 19.29; Rom 16.23 ^b 3 2Jn 4 ^c 6 Tit 3.13

teo'orerereb. Imih abifefeyan nanawan sabuw hai remoramaim hai yababan abisa'awat ana efamaim inibaisih saise God niyasisir. ^{7d}Ata Regah Keriso wabinamaim hitit hin tebowabow, naatu Eteni Sabuw biyahine baibais men ta tebaib. ⁸Imih it Kirisiyan sabuw iti oro'orot tanibaisih saise turobe isan it bairi tanita'imon tanabow.

Diotefes Naatu Demetrius

⁹Ayu iti bowabow isan i fef kabumin marasika ekalesia sabuw isah akirum, baise Diotefes bai'ukwarin isan ana yababan ebaib imih aki ai fair etei bai haw yare. ¹⁰Ayu ananan ana vey, sawar abisa sisinaf etei boro ana bow bebeyah ana ya. Naatu sawar kakafih maiyow aki isai eo yanuw bifufuwen auman boro anaoreb. Men nati akisin baise Kirisiyan sabuw afa tibinanawan auman boro men hai merar nay nabuwih, naatu sabuw afa nanawan buwihimih tekokok eo'otanih, naatu tafaroromaim ebobotaitih. ^{11e}Au of abisa kakafin men iniu'ur, baise abisa gewasin i iniu'ur, orot yait sawar gewasin esisinaf i God Natun, baise orot yait sawar kakafin esisinaf God men su'ub. ¹²Sabuw moumurih na'in tur gewasih maiyow Demetrius isan teo. Naatu ana bai'obaiyenamaim i tur sabuw ebi'obaiyih, naatu aki auman ana bowabow gewasin ebowabow isan ao'ofokafok. Naatu kwanaso'ob aki isan abisa ao'orerereb i turobe.

Yomanin Ana Merarayow

^{13f}Ayu au kok i boro tur moumurih maiyow ata kirum kwa isa, baise men akokok fefemaim ana kirum. ¹⁴Anotanot boro'omo boro anan ayumat ana'itin naatu bairit tanama tanidudur gaigiwas.

¹⁵Tufuw isa nama. A ofonah iti'imaim bairi ama'am a merar tiyiy, ta'ita'imon hai tur ina'owen hai merar ayiy.

^d 7 1Cor 9.11-12 ^e 11 1Jn 3.6-10 ^f 13 2Jn 12